


CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
MAY 7 1940

T 3200/0823.83 17

5



廣德州志卷六

營建志

城池
市鎮

公署
坊表

學校三
津梁

兵防
壇廟

郵遞
寺觀

倉廩
塋墓

爾雅釋天營室謂之定郭注云定正也作宮室皆以營

室之中為正鄘風序楚宮之作必候定星昏中是也然

則列邦興制並應星文而考工匠人營國祖社宮城門

阿經涂侯服皆稱此以為準營建豈細故哉廣德本為

漢縣而城池廨宇宋以來始可紀載前此則僅存寺觀

數處而已今由城及四鄉取諸土木之工訪求始末詳

其創修廢舉分類繫之俾有幹有年於茲土者皆歷歷

哈佛大學漢和
圖書館珍藏印

廣德縣志

可考見焉

城池

廣德之有城也見於杜君卿通典劉日輝唐志由來尚矣然此乃言漢縣故址在今州治之西南已無可考州城至宋始築建平更後起雖圯廢屢經修葺完固今者崇墉深濠堅若金湯居中控制四境環繞誠皖南之名藩也

州城池南畿志廣德舊無城宋淳熙六年郡守趙希仁僅

建六門設子城於內

案淳熙舊作淳祐萬曆楊門等志通志並同考宋史及萬曆職官藝

文志祠山事要趙希仁知廣德乃在孝宗淳熙四年其明年修大成殿則六年建城門非淳祐明矣淳祐係理宗年號中隔光寧二宗相去四五十一年舊志誤今改正

萬曆志門有樓元末兵亂

樓圯至元丙申六月明太祖令元帥趙繼祖邵榮領軍

始建城池為六門東曰迎春西曰崇德南曰明威北曰

閱武東南隅狃小門曰石溪今謂之秀水東北隅狃小

門曰常州今喚為水關

南畿志云築城濬池門因其舊東迎春西崇德南明威北閱武

東南石溪東北常州據此則趙守建門時已有此名矣其城周圍八里高一丈五

尺廣八尺濠濶一丈六尺深八尺出范昌齡志

案范係宏治十

七年州守辛丑年元帥趙去城無軍守尋圯

案成化五年知州陸

詳志目

鳳修整見姚夔記詳公署

宏治二年知州辛禮建城樓四所正德七年知州劉節繚垣覆以瓦高七尺厚三尺嘉靖三十二年知州莊士元始甃以磚并設堞其上三十五年兵備道朱舜民鼎建石門凡四上有樓沿城各有窩舖萬曆二年知州吳同春增砌裏牆高卑始一萬曆二十三年知州段猷顯重修城樓四門之匾更迎春曰瞻紫崇德曰望美明威曰兆符閱武曰拱極每門令兵快四十三名及三司弓兵踐更巡夜規制視舊一新舊例城牆樓舖科派里役分丈修理鄉民不便各出錢給守城快手

包修因行要挾頗爲擾民萬曆四十年知州李得中蠲免盡用官錢修理鄉民便之

楊志

國朝康熙二年州守楊苞重修補葺者十之三更建者十之七憲助之外仍捐已俸而以罰贖佐灰石計圖分堞按里任工方廣尺許內馬道廣丈餘下皆蒸土堅築承以木椿始於康熙三年九月歷六旬日而告竣更門名東爲熙春南曰麗正西曰安貞北曰拱辰又於東南隅開古石溪門曰鍾秀按形家言門爲巽方引秀水入城也舊城樓隘小今更建大樓四隅爲飛閣皆繚以垣楊

自為記

見藝文

案今城周圍九里十三步長一千二十八

丈乾隆三十九年坍塌二十丈知州恒豫捐廉三百六

十兩修葺先是州人呈請照楊守例按圖派費州為通

詳尋以擾民停止詳准捐修五十六年五月四城堞俱

有坍塌知州胡文銓捐廉修整

並有卷

建平縣城池南畿志建平因聚為治無城通志明崇禎四

年知縣侯佐始築周七百八十丈高一丈廣二丈五尺

門四楊志建平地勢卑下南濱於溪受桐汭萬山之水

地多泥淤沙磧故高墉之設獨後其城趾廣二丈五尺

上廣一丈城樓東西南北凡四南門右一水關無樓初

照田派費按丁出力南趾濱河無堅土城每一丈派田

一千二百二十一畝八分一釐東西北三面地平土厚

每一丈派田四百零七畝二分八釐時令處置有方民

忘其勞顧分畝計築乃一時經始之策其後田之盈縮

不一而修城之費仍照舊冊索派民甚病之康熙四年

大水泛溢城西南隅傾圮數丈邑令李景燦不忍以追

呼困民捐俸增修後里耆以按田公派為修城久遠之

計呈請照舊知州楊苞申請勒石四城門舊各有樓後

以形家言巒宮秀氣萃於離位不宜障其文峯故今獨闕南一樓東則吳越通衢守望尤亟其樓久頽知縣高自遠捐建五間制始恢焉李志後數十年瀕河者衝刷日圯雉堞漸頽知州李勳攝縣篆謀補葺之未及興工康熙三十七年知縣茅成鳳力圖告竣其勤事者耆民王日章丁啟義楊時鼎王拔慶戴鼎龍宗元貞王應隆宗孟師等雍正六年春知縣衛廷璞捐俸改葺雉堞是歲八月暴風突起城西北刷去七十餘丈又於七年重修

案築城本以衛民按里派費自宜說以忘勞然究屬一時權宜之計未可云良規也楊志乃云建平李令捐修後里耆有恩訂良規之控州爲申請勒石永遠遵守夫小民急公好義誠善俗也抑不知里耆此控果出於踴躍之誠乎或將藉手以肥私乎

國家定例遇地方緊要工作發帑興修從不許絲毫擾累仰見

聖天子軫恤黎元至意區區城垣豈待取給民間况縣令任寄專城原當先事防護隨時整理間有損壞捐廉

分所應得里者何得反行上控後此修築亦終不能
援楊氏成規也然志宜徵實故畧爲刪節書之而其
事不可爲訓因附論於後焉

公署

姚江黃晦木說大篆大人字云大之爲文象南面而
立正位而居之形人之爲文象拱手屈身東向之形
古惟人君南面臣下貴者東向賤者西向仲弓可使
南面包咸注言任諸侯可使治國政也明非諸侯不
得南面矣至秦廢封建則惟天子得正南面臣下雖
極貴亦止東向史記載項羽鴻門之燕項王項伯東
向坐沛公侍坐故南向不嫌其僭韓信得廣武君坐
之東向絳侯不好文學每諸生說事東向坐責之田

蚡自坐東向而坐其臣北面可證也今直省公廨自
 督撫以及州縣皆南面不知始自何代蓋督撫即古
 方伯連帥之職而州縣即古諸侯分符出治體制宜
 尊故也抑萬歷志有言儼然居是者堂堂皇皇豈徒
 取於壯觀瞻任威福哉靖共爾位無恒安息戒之深
 矣廣德廨宇明以來始可紀今除學署詳學校武署
 詳兵防外所有臨民出治之所新舊創廢綜列於此
 舊遊擊署獨西向者郡龍在離位權為避就非通例
 也

州署南畿志在城中洪武四年同知趙有慶建中為正堂

東西為吏目廳錢帛庫翼以吏胥諸房科南為儀門大

門譙樓北為後堂為官廨以及吏舍案後堂久圯永樂

間知州羅坤泰重修名曰思政堂楊士奇記成化五年

知州陸鳳重修廳堂廊舍姚夔記並見藝文萬歷志正廳扁

曰岳牧堂案即今大堂後為思過堂宏治四年知州辛禮建

舊名敬義堂嘉靖十二年御史虞守愚改為敬簡堂至

十二年知州朱麟始改名思過堂案即舊思政堂今二堂廳事左

翼為吏戶禮稅糧承發科右翼為兵刑工勘合科甬道

中有戒石亭另詳後儀門東為土神祠儀仗庫另詳後寅賓

館西為獄另詳後又前為正門譙樓另詳後知州宅在思過

堂後宏治十二年知州楊樸徙架閣庫於同知宅東即

其地建宅思過堂左有空基正德八年知州劉節建為

後樂堂案即今保德堂嘉靖六年知州龍大有復建堂於後樂

堂後案即今東書房宅後有桐汭池池上有君子亭另詳後吏舍

二所一在公廳東一在公廳西楊志嗣後興建非一明

季兵寇殘毀解宇半圯岳牧堂僅存前二級儀門及吏

舍塵礫煙蕪康熙五年知州楊苞重建儀門五間門之

內左右翼房科各十間左吏戶禮編承發右兵刑工糧架閣門之外寅賓

館土神祠及獄皆因舊加飭焉正廳後為永寧庫庫前

為冊庫砌以石另詳後左造快壯班房庭東西為皂隸房

廳後新建川堂堂後大廳改進思堂曰觀我堂案萬曆志有思

過堂無進思堂楊志則云州宅在進思堂後宏治十三

年知州楊樸建恐誤門志有靜治堂在州治後宋建明

正統十二年重建今改名觀我堂考一統志四圍繚以

有靜治樓無靜治堂門志亦誤互詳名蹟

堅垣有記見後門志康熙十一年紳衿濮陽忠等以大堂
頽圯殆盡呈請捐修知州高拱乾詳准捐俸二百兩米
二百石及紳士助建正堂五間顏曰節愛堂前為恤民

亭後為川堂有記

見後

李志六房久圯乾隆元年知州李

國相詳請動公帑一百八十五兩零修建共房二十六

間案儀門內舊有照廳久廢乾隆三十三年奉藩司

行查各州縣衙署有無損壞知州明福詳請修建三十

六年以大堂儀門折壞知州恒豫詳請捐廉九百九十

三兩五錢零重建大堂五間儀門五間有記

見後

四十九

年正月二堂中間及西次間坍塌卸知州穆通阿詳請借

給銀九百九十二兩四錢零改建共五間中曰恭敬惠

義之堂知州帥家相題堂東為永豐庫西為辦公書房

五十六年知州胡文銓詳請借給銀九百九十三兩零

通行修整有記

見後

正廳五間

即節愛堂

左右翼添建隸房六

間川堂三間門房三間二堂五間儀門五間照廳三間

鼓樓三間內宅五間東綠卿書屋三間西書房共八間

保德堂三間後敬思亭一座佇月臺一座桐汭池植荷

旁有老木新栽桃柳

國朝高拱乾重建正堂碑記國家張官置吏凡以為民也

惟是節其財求愛其肌膚以無負

朝廷用人求治至意至於莅政之堂無廢事而已非極朽

傲不敢易言改作何則重用民力厚之至也史載晏子

之居湫隘李文靖廳事僅可旋馬至今相傳以為美談

然守土者遽廬一官不難仍貫而郡人生長其地觀瞻

係焉發為義舉以襄厥成做極而復此亦物理廢興之大較也州堂始於明洪武年遠不可考矣嘉靖中貴溪夏侯重為修葺大堂四楹前為照廳更前為恤民廳合計共深百尺廣如今數我朝順治初因值兵燹大堂就燬僅留前二級雖規模淺陋不害為政但自始構以迄於今業經二百年柱撐朽蠹不蔽風雨每當淋漓上漏下濕幾欲張蓋聽治壬子之秋州薦紳士庶羣造於庭而請曰莅政之堂州民待命傾圮不治視聽何肅焉夫小民牖戶尚厯塗墜顧令具瞻之地簷牙零落其謂急公何且非所以重朝廷而崇體統也余謂工用浩繁計費何從况比年頻罹災旱物產虛耗敢以大役煩我赤子而紳士以為歲前差得小稔粗足庀工又州治界萬山中材木乃其土宜不假外取其修之便余雅狗其意申請撫藩各憲咸以為可遂率先捐俸二百金米二百石州薦紳士庶亦各輸貲有差茲一役也計用松二百餘株板瓦二十萬片各色匠役百五十名工四千餘度為大堂六楹顏曰節愛聯楹而下踵其舊制再廣為廳後則創增川堂一進

自正月二十八日筮吉訖二月十五日工竣嗚呼民勞則怨古今炯戒也余深慚德薄無以及父老乃猥承推舉董茲大役不惟不以拮据為累反懽忻而樂効之此雖州人桑梓盛典勢在必營抑亦熟悉余數年來節用愛人之心嗇施而豐報之者也夫余待罪於桐於今四載遙計瓜期正復無多倘

朝廷不以為曠廢量為移置則振衣而去此耳後之撫茲

州者誠不傷財不害民布節愛之德以涵濡而浸浹焉

吾固知州民樂効之心未有艾也是為記

廣德州治大堂及鼓角樓碑記予於乾隆庚寅春由部

曹承乏茲郡惟桐汭舊區為縣為軍為路為府為州為

直隸沿革不一要亦東南一都會也故州治規撫宏敞

官解具備惜歷年久遠予之始至也入其門如無人門

焉者登其堂如無人堂焉者堂非不高也其歸然僅存

則上兩旁風無所障蓋榱崩棟壞壓覆堪虞門非不厚

其開闕也而牆封藓瓦折鴛鴦但見榛莽土石叢塞

其上而已將何以出政治肅觀瞻乎間考州乘知官斯

土者率多名賢胥於是堂以臨民布化即范文正為司

理日抱其獄與太守往復辯論屢得其平反亦其處也而錢公輔朱壽昌相繼為政隨作新門修鼓角樓郵乞會子固為之記記有之慮度政理於是出納士吏賓客於是馳走斯樓所係亦綦重矣予刺是州之明年亟請於上官籌捐薄廉九百遞年扣還度支間有商士明於大義願襄公舉者聽用是鳩工庀材不侈輪奐但取樸堅不數月而堂成又不數旬而樓成其他門材屋瓦川堂甬道應易應葺應斷削黜聖連類而及者稱是不知者謂濶廬一官宦萍無定何必亟亟於傳舍為嗟乎惟其視此堂為傳舍前此者所見如是當局者又所見如是後來繼今者所見亦復如是宜是堂頽廢如是其極也至鼓角樓之不興又或惑於堪輿妄疑於文風有礙予則以州志具在熙寧初樓成成宋元進士者有沈憑沈冲暨錢用壬韋仲敬四五十人明初無論矣即隆萬間重葺後有夏良心李天植及國初雲中官輩亦不下十數人此雖不必歸功於樓而樓毀以來甲科漸少又將安所歸咎乎是豈不能振興文教而不思自力功名者所可藉口乎予之毅然建此堂

與復此樓亦非藉以博美稱闢俗論也會南豐謂政必有舉不得而廢亦冀尊施一郡不失宜稱耳堂之落成以辛卯冬松茂竹苞桷楹軒敞於焉臨吾民肅體制以視昔之張蓋聽訟時懼阡危者為何如樓工歲事則在壬辰夏秋之交倚其檻以望邇延野綠遠混天碧筭山一帶諸峯拱揖南闔譙門內者咸得獻奇效伎於此是使斷瓦頽垣仍復鳥革翬飛之舊矣先是康熙十有一年前輩高拱乾重修是堂曾顏曰節愛堂其願後之同志節其財求愛其肌膚意良厚也因仍之樓有鼓鐘各一以節晨昏圯後鐘猶存昇至他寺今皆另製予知州事夙夜惴惴每愧無術能令政通人和百廢具舉以稍裨

聖治竊願州之人士聞此晨鐘暮鼓各加警省勤爾業祛

爾偽無以訟事入吾門而登吾堂庶共沐浴休養於

盛世永永安樂又州多廢弛若城垣若壇廟若學塾橋梁

其應次第整飭修復難更僕數此堂此樓特其權輿斯

則予與後之繼今者所宜共勉不可以不書是為記

胡文銓重修州署記桐汭舊多賢牧州治規模甚備前

乎此者創而可因斯後乎此者仍而不改雖然魯叔孫
 所館一日必葺墻屋是則傳舍且然况官舍乎余由農
 部牧茲州在戊申仲夏徧歷堂室頗有頽圯者思重飭
 之顧下車伊始修舉宜務其大者復初書院工未竟急
 為完整俾生童肄業其中城隍廟為州保障捐廉倡修
 厥制巍煥復重建明修撰王公祠並置祭田以資歲時
 瞻拜皆尅期蒞事然後謀及官解雖於舊製中畧為更
 新然亦幾費經營矣鼓角樓內為大堂出政地也額曰
 政在養民進而二堂亦治事地也額曰常存敬畏其東
 為保德堂則賓友所集二堂東北書房三楹修篁掩映
 雜蒔花木名之曰綠卿書屋其東偏為衡齋乃退食之
 所夫為政之道在於得民心民心之得貴於通達事理
 權衡悉當余雖不敢以循卓自期而公以宅衷平以應
 物於持衡之義時時服膺弗失故以衡名齋所稱東書
 房也後多隙地有蓮池舊志所載亭臺久廢傍岸多榛
 莽墻塌幾與民舍通余乃高其垣平其道删除穢蕪因
 高為亭遙嵐突兀老樹扶疎補栽竹梅桃柳於其旁余
 牧此數年凡衙齋傾圯者皆捐廉修葺非為逸豫計也

曲禮曰毋不敬儼若思詩云敬之敬之天維顯思因顏
 之曰敬思誌敬事後食退思補過之意也又有額曰小
 方壺聯集右軍蘭亭序字云山靜林初茂亭虛竹自幽
 是亭落成後適己酉夏田禾待澤每間旬餘輒苦炎旱
 余齋心虔禱神廟自城隍龍王及郭外之祠山大帝更
 有鄰境之西溪龍神十餘里及百十餘里往返徒步毋
 敢稍懈匝月之間凡三禱焉無不其霖廣沛余舉酒是
 亭出諸廟祝文徧示座客感相顧而樂之因復名為喜
 雨亭其相對者為佇月臺培西隅墻址得丈許剪茅成
 屋編竹作籬顏其門曰別有天稱茅屋為五柳居池中
 設舫可容二席芙蓉開日放之中流與客賦詩把盞其
 間吏也不啻仙矣夫有堂以肅觀瞻有亭榭以資憩息
 幸值歲稔時和化行俗美深沐
 聖天子仁壽萬年之鴻施余雖不敏而敬事後食退思補
 過藉以獻黼黻鼓吹之忱惟願後之視今亦猶今之視
 昔存叔孫葺屋之意而不以傳舍視官舍焉是深所望
 於同志也乾隆五十七年五月
 賜進士出身

誥授奉政大夫署理安徽寧國府知府事直隸廣德州知州前戶部江南清吏司主事管理飯銀庫總辦軍需局

事務大興胡文銓撰

恒豫捐修廳事落成示應試諸童承乏山城已二年虛

堂景物太蕭然清貧願載輕舟石葺屋慚糜少府錢細

雨燕飛雲棟外春風花放硯池邊漫誇月旦添聲價文

采風流望後賢胡文銓保德堂簾捲春風拓地寬同

羣雅稱坐團園酒因愛我常為伴花亦如人耐久看室

靜自懸高士榻談深每盡故交歡欲知保世惟滋德敢

易清操誤一官綠卿書屋熏鑪茗椀靜中過竹院真

疑安樂窩綠上短窻聲浙瀝白添虛室影婆娑俗情恬

淡閒方覺書味沉酣悟自多最是揮毫伸繭紙又聽好

鳥喚晴和

錢帛庫萬厯志在州廳右知州江暉穿以石藏知州朱

麟園以堅墻架閣於中復屋其上案楊志康熙五年修

永寧庫即此今名外庫房三間在州判署東南

永豐庫一間在二堂左

册庫萬厯志在思過堂後宏治十二年知州楊樸因建

州宅徙同知宅東楊志康熙五年知州楊苞建貯丈量

册有記

楊苞册庫碑記為收貯丈册事案照廣德鼎革以後丈

量者三皆中輟而未報竣是以無册收架迨余守土復

又奉檄丈量遵即條示丈法釐剔積弊簡約舉行不數

月而丈畢不數旬而册完除報憲外所有存州魚鱗歸

里等册自應修理舊庫挨圖收貯以備查核但事不難

於謀始而難於慎終不難於慎終而更難於垂久而無

弊則督視在官其典守在吏也為此與經管該吏約務

知圖籍所在關係綦重遙相告誡咸當遵法塞向扁戶

公署

防範宜嚴垣穿屋漏修葺毋緩凡有因事查冊者稟明正堂請發鎖鑰聽候委員或親詣冊庫開取面查查檢既畢冊還原處門仍照前封鎖俾冊不許離庫遠攜門不許私自啟閉著以為令犯則重懲庶幾奸竇無隙可乘弊杜而可傳永久也爰勒諸石以儆後之司守者

儀仗庫通志在州署儀門東

監獄在州署西明季建楊志康熙五年知州楊苞修并

捐買囚田案內號四間外號四間神堂三間禁卒等住

屋共四間虎頭門一間久未修整滲漏朽壞乾隆五十

六年知州胡文銓詳請借修估實工料銀九百九十兩

零 撫憲朱題奏領帑於六月興工九月工竣

附楊苞捐買囚田文為遵諭請給罪囚口糧等事康熙四年十一月十八日蒙按察司正堂劉憲牌開蒙巡撫部院張批詳前事奉憲禁飭並不濫禁一人監內見在重囚不過寥寥數名再四籌度如每月所給口糧實係捐俸資給量捐置田以垂永久卑職不敢於何項錢糧動支於本年十一月內捐俸五十兩契買民人李際成等田三十畝共計一十四坵坐落三十八都地方隨召程繼華程繼榮等佃種取有認狀在卷遞年議償租二十二石內除輸糧外餘穀量給監內罪囚口糧又該本州看得囚糧向無額設而捐給原非久計仰遵憲飭業經自置民田三十畝除先輸賦稅外每歲取租計口授食以垂永久以彰憲臺恩恤罪囚之澤也擬合具文申詳為此今將前由另具書冊合行具申伏乞照詳批示施行奉按察司劉批該州捐俸置田具見體恤至意仰候彙詳批行繳楊苞堂後修葺墻垣碑記事有似私而公似緩而切者解署似私而庫獄在焉則公峻解署之墻垣似緩而以備非常於肘腋則甚切也余莅任二載州署僅存傾圮特甚思為陰雨之綢繆久矣而時有

未遑貲亦維艱項奉憲檄修城告竣固已寢食於竹頭木屑之中就其所餘甄石乃命鳩工浹旬以來百堵皆作大率官府營繕例委該管胥役役之所為利其圯而復葺因染指其間故多揜障耳目余痛釐厥弊一切經營慘澹出之口授指畫故堅久動可百年計嗟乎守土之吏見百姓之利病若驛馬肥瘠之過於前覩一方之興廢若旅舍偃築之議於道此恒情也獨余不然蓋朝廷簡命司牧上之設險金湯次亦垂蔭棠芾匪僅壁上觀人隙中過駒也而吏茲土者建置以垂永久亦無負茲旨云爾且署以前鼓角荆榛鳥飛鼠伏吏舍頽廢書亭榭未遑也署以前鼓角荆榛鳥飛鼠伏吏舍頽廢書役抱公移立風雨中余俱姑置之而汲汲於墻垣者誠以捍庫獄禦非常不但除風雨而去鳥鼠已也第不識繼此者能恃余所已成而補余所未逮否也爰鑄石以記

譙樓即鼓角樓明萬厯庚申年知州段猷顯重建夏思

記後見乾隆三十六年知州恒豫修五十六年知州胡文

銓又修詳名蹟

明夏思重修鼓角樓記鼓角樓為南端庭戶宋治平間錢公輔朱壽昌繼守是邦始營新門鼓角樓成至元祐改元僕文質範金為壺器明初郡貳趙有慶暨太守黃伯顏后先般倕於茲今上下十有七年樓災會遷客頻輅去來代數而已歲癸巳汝南段公猷顯奉上命為郡大夫既下車召諸父老於庭曰鼓角在前猶脊宇然匪是痺弗式觀如治何諸父老曰惟命遂程工布令因蠲緩金擇耆命掌出納而董其役揆日於魏辰晉丑之月急景洒輝鳩工肇舉伐材於山庀石於岩塲埴於冶子來相將甫徙月而宏規鬱起麟麟翼翼翹如屹如頓還舊觀矣竣報大夫睠焉四顧額曰開天重郡曰環翠曰江山勝覽曰仰觀俯察夏子曰善哉大夫能審其所廢也當其落之俄有鵲來巢良非偶然詩不云乎實實枚枚為闕宮有血頌至矣而必曰無災無害生子后稷降

之百福頌之不已又從而祝之者何誌喜也鵲喜也巢自隅西西告成象也厥工既成時行承天孰居其右闕宮釐祝茲其兆祥云是役也季冬庚申始事至明年之三月卒工餼篋版瓦凡六萬有奇費凡十有五鎰高三步廣三八步

段猷顯郡譙落成志喜層樓高倚大江開翠色平分天際來畫棟遙連龍虎國飛梁斜枕鳳凰臺雲移象緯星河近風送吟聲鼓角哀且喜頻年烽火息暫移樽酒一徘徊

山光樓 桐汭樓 萬歷志俱在州治後今廢

靜治樓 萬歷志在州治後今廢 詳名蹟

范公祠在正廳左三間 互見壇廟

恤民亭在正堂前康熙十一年知州高拱乾建今廢

觀志亭 萬歷志在州治內嘉靖十五年知州朱麟建以

為引士課射之所案今久廢

戒石亭 萬歷志在正堂前甬道中洪武間建敕郡縣勒

銘於石警於有位即宋太宗書孟昶四語楊志康熙五

年知州楊苞磚砌內立戒石案今廢豎木坊書之

旌善亭 萬歷志在州正門外左洪武三年知州魯參設

內懸板榜凡民有孝行節義者書其名以示勸後廢萬

歷二十六年知州段猷顯重建案乾隆四十一年知州

趙滂建於頭門內左與申明亭並列 榜列善民姓名詳義行

申明亭萬歷志正門外右洪武十六年知州周遜設內懸板榜凡民有過惡者書其名以示戒後廢萬歷二十六年知州段猷顯重建李志康熙十二年知州高拱乾修案乾隆十六年知州帥家相修十七年移建頭門內左

秀遠亭南畿志在州治前詳名蹟

君子亭萬歷志在州治後桐汭池上知州王邦瑞建門志久圯康熙十二年知州高拱乾重建案池方廣二十丈許故植荷君子疑以此得名乾隆初李守咏並頭白

蓮卽此池

翠溪亭 圓嶠亭 方壺亭南畿志俱在州圃楊志今

圯互詳名蹟

桂花亭 蠟梅亭俱在州署內知州閔以棟有詩見續

萬歷志久廢

國朝閔以棟桂花亭同友人坐月戴星出入敢言劬暫息亭前酒一盃花影搖雲紛片片月光射紙白蘇蘇米家石丈猶堪拜單父琴心何日敷深夜莫辭更漏通共君卽席且歡娛

敬思亭一名喜雨亭在州後圃知州胡文銓建

胡文銓詩雲聳朱欄宛轉通憑虛身擬隱壺中鈴聲頻和蕭疎竹燈影偏隨料峭風山擁畫屏工點染波澄金

鏡勝磨礪清娛猶凜思
無敦古訓由來敬在公

佇月臺在州後圃知州胡文銓建

胡文銓詩層高景物謝囂塵近水先邀月作鄰好放雲
山千里目慣收花鳥四時春撫琴乍歇歌聲杳欵客微
酣酒意醇為愛清光畱
永夕敲詩莫管漏催頻

桐汭池在州後圃今名荷池知州胡文銓濬

胡文銓詩翠蓋勻含露氣滋澄懷剛是納涼時生花欲
試凌雲筆出水爭誇絕世姿幾樹春陰遮畫舫一番風
影漾青旗閑愁豈繫紅衣落隨意尋芳到處宜庚戌
中元夜同人泛舟荷池小飲卽席迴塘殘暑雨餘捐景
物崢嶸憶去年紅豆歌翻明月巧碧筒杯走夜珠圓每
驚妙想開天外應羨名花滿眼前小隱方壺饒勝槩底
須蓬島
問神仙

同知署萬厯志同知署二在州廳東各有亭池舊在西今

存其一楊志官裁廢久圯康熙五年知州楊苞改建常

平倉九間左建兵餉倉共九間前為馬廐及馬神祠祠

之左新闢射圃內豎箭樓

州判署通志在州署西萬厯志州判宅二俱州廳西各有

亭池舊在東今存其一楊志屋三進右畔有小池案乾

隆三十四年州判馬輝重建制尙隘五十二年州判

劉成章重修加恢廓焉大堂三間顏曰思贊堂二堂三

間二十七年州判顧夔璋題曰潢清堂有記書於匾大

堂前東西吏房二門五間頭門東向額曰舊司理署劉

成章改題范公舊署二堂後住宅三間有樓其東為范

公亭後另詳前後書房各三間其西為居易軒亦劉成章

題後書房三間西為池池南有土神廟有記勒石

范公亭楊志在舊司理廳東南宋范仲淹嘗為司理治獄

廉平作亭於此引囚訊問皆得其情後人因以范公名

之案乾隆四十七年州判劉成章修顏曰願學朔望拜

謁焉古老相傳此亭舊名一梅以庭有老梅一樹也范

公嘗手書勒石云

國朝顧夔璋潢清堂記邽治之道心清則政清原不在水

泉之清濁也然理或相感往往有之州基發脈筭山入

南城城外數武有潢水塘素混濁色類黃泥如賢刺史

暨賢司理有善政溢於野則水為之清宋范文正公為

州司理疏免滯興學校勸農桑焚淫祠為士民所依附

此塘一清至今州人士立廟祀之而州牧任內前明會

三見本朝惟一見俱載州志則自宋迄今入百有餘歲

此塘為州牧而清僅四見為司理而清僅一見耳余莅

任匝月尚乏善政及人遽顏其堂曰潢清豈後談化感

於貪泉妄思徵瑞於苦水與抑泉清必先政清政清必
先心清物理俟應古今不爽今去文正公遠矣而潢塘
如故倘自今以往茲斯土者能景范傲范心與政俱清
焉庸詎知潢塘之水不更為後之人澄清乎則是余因
塘而勵厥志塘因人而效厥靈將見穹窿窳窳若洒而
明區壤塵氛若滌而淨萬物盡歸清寧之宇又豈僅區
區塘水之為徵乎爰以額之有厚望焉襄陽顧夔璋題
劉成章重修州判署記癸卯冬余莅斯任視其衙署惟
大堂二堂尚屬完固餘皆朽塌謀修之而力未逮暫將
公署

住房及四圍墻垣畧加補葺稍蔽風雨署東有范公亭蓋宋文正公舊跡椽瓦頽卸丙午夏余捐資修理添建兩廂并大堂二堂而丹雘之茲因衙之頭門二門及署內房屋榱棟傾圮且向無書房可為寅賓辦公所遂申請借廉葺修而工費繁浩深慮不敷州中紳士各願隨力襄助於丁未孟冬朔庀材鳩工卜吉起造頭門一座二門五間內宅樓屋三間兩廂之西平屋三間廚房三間書房五間戊申嘉平始得落成計費千餘金未嘗少假胥吏之手余莅任五載會三捐三修於茲工堅料實可稱苟完矣惟念州境士商耆民遇有公事輒能慷慨慕義踴躍赴公誠有足嘉為誌其名及捐數壽之於石以昭來許爰為記乾隆五十三年戊申季冬判廣德州事劉成章識

周廣業題范公亭贈劉泉亭別駕時見示文正公年譜及潢清堂記山窻淡冬曦風曠忽改狀旅居局城南據古味所向州端枉見招入座眼初放莎廳嘯詠餘泉石展清曠遺愛懷范公解褐治已上讞決必端平抱贖論

每抗至今聽訟亭姓氏輝粉榜修舉得後賢翼翼快瞻仰老樹撐高空竹韻憂幽亮種梅畱古香凍萼春意盎瓊筵為我開高談轉諧暢琬琰勒曩編紀實勝咨訪水清會有時美績寧多讓珥筆愧無文述此答嘉貺

吏目署通志在州治西南萬厯志在州判宅南舊在同知

宅南有池楊志二進右畔有小池案大堂三間乾隆十

八年吏目譚秀信建二堂三間東門房三間西書房二

間堂後吏目宅雙桂堂五間書房三間大門一間二門

三間俱西向二門外左吏舍右班房又署西廳三間東

西房各三間俱三十四年吏目徐忠孝改造未竣四十

九年吏目楊大純繼修大堂前西關帝祠福德祠共三

間楊大純重修廳旁臨池綠天水榭一座徐忠孝改建楊大純於舊池南濬小池建德輝亭其上栽植竹木

醫學南畿志在州治前萬厯志州治南洪武十六年設後裁三十三年復建年久頽廢嘉靖五年判官鄒守益重建未幾廢四十五年知州李得春重建案廢址在昇平坊三峯樓北今為民居

陰陽學萬厯志在州治西案建廢同醫學今址在永興坊丈量亭北廢為民居

杭村巡檢司南畿志在州北七十里李志今在杭村保

陳陽巡檢司南畿志在州南八十里萬厯志州西南六十

五里案二志道里不同楊門等志俱同李志今在獨樹

保離城七十里案是缺於乾隆三十四年裁廢

廣安巡檢司南畿志在州南八十里萬厯志三司俱洪武

六年設至宏治初李志作隆慶間誤知州辛禮重建李志今在

焦村保離城七十里三司署圯廢已久巡司在城僦屋而居乾隆二年知州李國相詳請動帑四百二十餘兩

分建衙署每司頭門五櫺房三間中堂七櫺房三間後堂七櫺房三間五櫺廂房六間共十五間案廣安司署

於乾隆三十四年詳請借給銀一百五十五兩零重修

下梅巡檢司萬厯志在州西南九十里其基今為下梅寺

僧正司萬厯志在州治東開化寺洪武十五年間設

道正司萬厯志舊在元妙觀嘉靖五年判官鄒守益遷於

東門外

東察院萬厯志在州治東仁德坊洪武三年同知趙有慶

建中為肅政廳後有川堂後堂廳房前翼有廂房重門

正德十三年知州周時望市民間地為候事廳俗呼為

小察院楊志俱圯康熙六年知州楊苞捐俸重修案今

復圯乾隆四十六年知州石應璋即其址建市房歸其

租於復初書院以給膏火又魚鱗冊云土名大察院在

城二畝又有中察院在狀元坊南至街北至官基西至

皇華亭東至巡風衙為地四畝一分有奇

大察院萬厯志在州東案今久廢

西察院萬厯志在州治西南楊志今圯康熙六年知州楊

苞捐俸重建案今廢址在孝子坊丈量亭之西與陰陽

學基連界乾隆五十六年知州胡文銓准典商造房起

租歸入書院膏火

南察院萬厯志在州治東南萬厯三十一年知州何宗賢建楊志今廢案其址在狀元坊范公亭之東乾隆八年

署知州徐敦蕃改建正誼書院詳學校

兵備道公署楊志在東察院左今廢

案通志嘉靖三十四年設兵備道轄安徽寧池太廣六屬治廣德四十一年罷隆慶六年復設改為兵備徽寧道駐旌德後治池州萬厯三十六年議治寧國廣德各半載四十二年徽寧分設兩兵備一為徽安道駐池州一為寧太道駐廣德崇禎四年復改徽安為徽寧道五

年移治旌德轄徽寧廣德

附

養濟院南畿志在州治東南萬厯志洪武間詔天下府州

縣收養鰥寡孤獨廢疾之民勅屋以居號養濟院在州

東南文淵坊巷永樂十年知州楊瀚重建成化間知州

周瑛重書門匾凡養老於院每名口月支米一斗柴薪

錢六十文每歲棉苧布各一疋李志在州治東寶華坊

案文淵寶華坊名不同乃今昔之異楊志在州治東城內則固舊地也基地二畝三分一

釐舊小房二間乾隆元年知州李國相增建堂屋三間

三年增建堂房四間案乾隆十六年知州帥家相倡捐
 改建大門三間正廳三間門房共七間東首十一間西
 首十五間北首十一間州孤貧共八十五名每二名合
 住房一間男女不許混雜佔奪立碑兼刊木榜示諭五
 十三年西首房十八間燬於火孤貧半無所栖或寄居
 城外而頽房容畱戍犯現行嚴禁并圖修復焉

國朝帥家相重建養濟院記廣德山谷阻阨風俗質樸無
 車牛服賈之人又乏百工奇巧餬口之術嗟我桐黎豈
 無瘡痍困苦冀所以出水火而登衽席者案定例直省
 州縣俱建養濟院凡鰥寡孤獨及篤疾之人貧窮無親
 屬依倚不能自存令所在官司收養又定例窮民有浮
 於額者作為額外孤貧散給口糧毋致失所仰見我

朝仁心仁政哀此犛獨有加無已之盛意余謬牧桐川兩
 載所有學校倉儲俗尚水利各鉅政俱次第整理而最
 關於民命者育嬰堂之外莫如養濟院一事是州孤貧
 正額六十名額外二十五名共八十五名計每間居住
 二名約需房屋四十三間方敷派住舊止頽屋七間孤
 貧多四散寄住難以稽查若令搭棚棲止風雨飄零又
 堪矜恤余倡修建又遵憲檄勸諭好善紳士急公義助
 共成大門三間正廳三間外南首大門左右房各三
 間東首房十一間西首房十五間北首房十一
 間四圍統計房四十三間每間濶一丈進深一丈八尺
 簷高七尺五寸前堂後寢有門有牆釐然可觀始於乾
 隆辛未後六月初十日落成於本年十月十五日需銀
 共五百三十餘兩余捐銀八十兩外餘藉衆擎好義可
 嘉其勸募紳士則有貢生沈輝祖雲克繩生員孫一
 班趙楚珩巫蘭監生許翼呂鉉王鶴張鳴臯陳期年呂繼
 尚裘之琪而總理其事者則貢生濮陽緒共一十三人
 將伯之助殊不可泯茲役也余經營布置工不曠時費
 不及國告厥竣事聊畢乃職矣雖然撫我百姓偶及歉

歲紛紜擾攘啼饑呼寒余父母之任雖請獨請賑百計
安全而目擊情狀實有抱憾於中而不能釋然也或曰
天下之待養於使君者豈獨此地哉而奚以區區為余
應之曰堯舜猶病之心勉自近始乾隆十六年歲次辛
未孟冬月

賜進士出身奉政大夫知直隸廣德州事前戶部文選司
主事武英殿侍直翰林院庶吉士帥家相謨文
賜進士出身文林郎儒學學正前潁州府學教授知直隸
新城縣事華恒泰篆額訓導史化鳳
書丹州判陳典吏日孟奕清仝立

育嬰堂在西門外朝斗坊李志舊樓三間照廳三間東西

小房各三間基地一畝三分一釐六絲六忽塘一號三
分三釐三毫三絲三忽田一號一分六釐六毫六絲六
忽在東孝都四畝二甲僧淨明戶下完糧乾隆二年知

州李國相造堂房三間復捐募買田六十六畝共銀二

百六十五兩六錢河田四十畝八分二釐七毫九絲三

忽案魚鱗册堂字一號至五十四號河田計田地共田
共四十畝零二分一釐俱在城外沿城

一百六畝八分二釐七毫九絲三忽有記案田係巫佩

管理

李國相育嬰堂記嘗考禮經月令仲春日養幼少存諸
孤漢志亦稱十歲以下上所長也育嬰之政自古為然
我

朝惠澤汪洋遍洽黔首而於京師設育嬰堂收貧家兒諸
不能乳哺者聚而乳哺之懷保之道不綦密與嗚呼天
地間跛行喙息蠕動之類無不知生子而愛之患其天
札况於人乎嬰兒甫見日月之光應予以保抱攜持冀
其長大柰何呱呱而泣棄之如遺虎哺鳥覆曾有幾人

孺子何知能不惻然余自守桐川於今六稔矣凡裨益吾民之事佩弦自急從無寧晷丁巳歲曾建置育嬰堂欲以廣

聖天子暨諸大憲好生之德柰宦橐蕭然難為繼也今悉索薄祿以為倡率更賴諸紳士之力各出白金買田一百六畝有奇斂其秬稻以供乳母之需不使匱乏又遴選攸好德之人以董其事而實其惠昔者賈彪令民間勿棄子女數年內養活者千餘僉曰賈父所長余亦何敢遠慕古人雖然淮南子曰三月嬰兒未知利害而慈母之愛諭焉者情也余有保赤之任撫茲穉子怛怛心動亦庶幾有是情而已矣是為記

建平縣署南畿志在郎川之澣

萬厯志在郎溪北

洪武間知縣張

翼建有正堂後堂幕廳六房儀門譙樓及官吏解舍

案翼

係洪武三年令縣治舊規皆所創建萬厯志亦詳載之縣志初自連鑛去洪武不遠乃云縣治正廳三間舊建

無考遂使數百年臨民治事之所茫不知所自來李志仍之謬甚楊志於正廳三間闕其建年獨於勤政堂載明洪武三年知縣張翼重建一似翼止建此一堂者皆由不考故也

萬厯志中為正廳後

勤政堂左幕廳右收支庫前戒石

楊志云今廢

翼以六房又

前為儀門左為儀從庫及土神祠右為架閣庫及縣獄而譙樓外麗焉知縣衙在勤政堂後吏舍二所知縣連

鑛建旌善亭在縣治右

李志無此亭

申明亭在縣治左李志

正廳三間康熙十五年知縣張顧行重建

楊志正廳前有恤民廳李

志不載蓋已廢後為川堂雍正四年知縣蘇祉建川堂後為稽

德堂即勤政堂雍正四年蘇祉移建又後為望雲樓知

縣李景燦建

楊志云郎川樓水池樓皆縣治廳今廢然則望雲樓即其故址歟

其後即

內衙也左為省日堂康熙二年知縣栢肯堂建堂左為

瀾亭

縣志即泉亭知縣衛廷璞建

釋志亭其前為寧靜軒康熙五十

八年知縣王曾淑建幕廳五間知縣蘇祉增建五間於

後左為互益軒儀門左為寅賓館久廢譙樓康熙十二

年知縣高自遠重建武庫在儀門外久廢吏舍東二十

四間西七間申明亭及榜亭俱知縣茅成鳳復建永寧

庫李志不言所在但言縣署後路偏永寧庫

馬廠萬厯志在善政坊東宣德八年管馬主簿李凱

續萬厯志

誤作剛

建四面各百步楊志今廢

織染局萬厯志在譙樓東

楊門等及縣志不載此局蓋廢已久矣然不應沒其名也

醫學南畿志在縣治前

僧會司萬厯志在開法寺

道會司萬厯志在存真道院

案南畿志亦有道會司楊門等及縣志不載道會司非也

陰陽學南畿志在縣治前

萬厯志不載

纂節局萬厯志在縣治東係州分稅局

案此局久廢楊門及縣志止載纂節

局而不詳所司誤也

梅渚巡檢司南畿志在西三十里楊志縣北三十里今衙

舍廢案今在縣北重建

陳村巡檢司南畿志在縣南四十里楊志明嘉靖年裁革

今廢

察院南畿志在縣治西案此西萬厯志在縣東崇信坊知

縣王克友建楊志洪武八年建正廳三間泊水一間川

堂一間後堂三間厨房七間左右隸房各三間儀門三

間前門三間小憩亭一間李志年久盡頽康熙三十七

年知縣茅成鳳修後因地勢低窪水溢垣圯知縣王曾

淑重修積土培高始可駐節歷數十年又圯雍正八年

知縣衛廷璞重修

候事廳三間楊志察院外門右

附

養濟院南畿志在縣治北李志在叢桂坊南北長三十八

步東西濶六十六步建平存稿舊屋頽壞孤貧三十八

口無所栖乾隆十七年知縣貢震重建有記

育嬰堂在縣治東乾隆十五年知縣貢震卽城北四先生

祠址並買市房爲門堂樓廡二十七間有記三十五年

後宅燬知縣王惟一捐廉重建四十六年知縣周作淵

以郎川書院房屋互換今所狹隘不能容乳嫗半寄居
於外共置田地三百五十三畝九分市房十一間租

折錢四十兩
縣申

五七

廣德州志卷七

營建志

學校一

學校

學之有廟有黌始於宋而歷代恢廓之所以尊師而
育士也廟既有從祀矣而凡功德在民聲施鄉國者
亦與焉進而忠臣義士孝子悌弟亦與焉於是明有
名宦鄉賢之祠

國朝有忠義孝弟之祠又有輿情推戴儒流景仰之專祠
及合祠黌既有堂及齋舍矣而童蒙之養別有社學

以居之賓朋會講師生督課別有書院以居之廟以尊師故有禮物焉有樂器焉長吏所由春秋展敬而都人士所以觀法也覺以育士故有經籍焉有錄矢焉俊秀所由晨夕服習而不帥教者之所以愧勵也學不廢遊則有山有亭以調適其性情學不憂貧故有田有膳以優恤其身家雖然規模不可不宏遠也有泮池以毓靈秀而芹藻流香矣有樓閣以壯形勢而奎壁爭輝矣昔人於廣德之學之制可謂美且備矣維持不敝是存乎善後者

州儒學在州治東南萬歷志宋天聖中司理參軍范仲淹

建於州治北

南畿志作舊在城北范仲淹建

治平中知廣德軍錢公輔

遷於州東南隅即今學基也尋燬於兵

案紹聖中知軍孫諤重創大成

殿見萬歷名宦志

紹興初知廣德軍洪興祖重建

案先時知軍李健建大成

殿見萬歷職官志

案淳熙間知軍趙希仁大修學

杜炎撰記萬

歷志元知廣德路僕文質擴而新之

案今明倫堂有殘碑書甚工而失下

半截上篆皇元廣德路修建廟學記所載官有學錄鄭禾等又有高昌人三字考明一統志文質係高昌人知

此碑即是時所立者蓋延祐年間事也餘詳職官

明洪武二年案明一統志同知

趙有慶因舊規而崇之永樂九年知州楊瀚

案瀚職官志作翰

廓址鑿學河而復新之成化十年知州周瑛遷明倫堂

築萬桂山案瑛自為十六年判官王璽多所修建案亦周瑛

作記見藝文宏治二年知州辛禮易民田為河嘉靖四年判

官鄒守益改元妙觀為復初書院案即尊經閣詳後南畿志嘉

靖十年制增啟聖祠建敬一亭貯宸翰六碑萬歷志萬

歷十五年知州陸長庚增鑿河之南名曰毓秀案萬歷

間禁書院故明末廢書院而存尊經閣

國朝雍正五年奉

旨建忠義孝弟祠於學詳後乾隆四十八年知州石應璋建

書院於文廟西仍名曰復初詳後學中規制始稱大備

先師廟楊志明初同知趙有慶修建判官王璽知州辛禮

繼修案正統四年知州劉詵等重建楊溥撰記見藝文萬

歷志宏治十二年知州楊樸改建嘉靖三十三年知州

莊士元重修萬歷元年知州鍾振四年知州吳同春歷

修未竟案元年修學管志道撰記四十三年知州陸長

庚始克竟事其櫺星門係正德十四年知州周時望作

於泮池前嘉靖三十八年兵備道朱舜民易於泮池後

泮池橋係正德十二年判官况照建萬歷庚辰州守用

形家迎吳秀之說撤櫺星門與泮池橋俱面東南隅形

勢既偏風氣益不利案萬曆藝文志載李天植段侯修學記中稱嘉禾津陽陸侯修舉舊

觀庚辰用日者言復徙向東南考庚辰乃萬曆八年而

陸係十一年任其八九十年有孫汝賓何起鳳方沆

三守此事果在庚辰則不應叙於修舉舊觀之後如果

陸則非庚辰也天植此記恐係後人傳寫之訛或竄改

失其本真惜無原碑可質然此處但云庚辰州守原未

明言州守為何人楊門李志俱作庚辰州守陸公用形

家之說並不一按職官志輒增萬曆二十一年知州鍾

陸公二字歸過長庚殊不可從

庚陽從輿議更正之而功未訖知州段猷顯克底厥成

廟中為正殿翼以兩廡去廟前四十步為廟門門東為

名宦西為鄉賢二祠另詳名宦祠前舊有碑亭碑存亭

後

圮又前為櫺星門門西有井亭亭圮而井存案今井中亦湮

為泮池池上有石橋橋前有木坊顏曰宮墻在望案今無此

顏坊下有門門之左右有柵坊前并明倫堂大門前為

毓秀河案據此則其時櫺星門尚在泮橋北橋前另有木坊今橋前三坊均係石坊坊中柵門即曰櫺星門三坊之間均砌磚墻其規制想改在萬曆之後楊志未載改易之時今無可考矣
七年 文廟圮知州曹更新重建

國朝順治七年 文廟明倫堂啟聖祠俱圮操撫李日芄

兵備道袁仲魁捐俸命學正孫廣翁董其事未竣陞任

十一年學正黃如馨董造完工大學士呂宮撰記記附後

東廡知州孟希舜重建泮池兵備道孫登第助修案孫登第

自撰記見藝文康熙六年文廟漸圯知州楊苞捐俸二百兩

學正荆振日董修案康熙十五年州守高拱乾重修

文廟自撰記見藝文三十年知州毛渾學正盛彰訓導沈

會成重建兩廡沈會成撰記文現存東廡匾上李志康熙二十

四年恭懸

御書萬世師表匾額於大成殿三十七年知州李勳學正

盛彰訓導張銓重修案李勳自撰碑見藝文康熙四十年泮池

起蛟橋星門石坊泮橋俱圯知州陳祥裔重建陳自撰

記附後李志雍正四年恭懸

御書生民未有匾額於大成殿五年知州丁勺會學正胡

伯炯訓導李生泌重修乾隆三年

御書與天地參匾額頒行天下學宮知州李國相遵式恭

製謹懸正殿案乾隆十四年知州會尙增興修未竟知

州帥家相繼成之帥自為記附後四十二年知州石應璋

學正朱裕觀重修聖殿及兩廡五十二年知州穆通

阿重建戟門工未訖今擬續成之

國朝呂宮重修儒學碑記順治十有二年春及門黃子如馨自桐川來謁詢其山川土俗為言桐僻壤不足述然

職學言學先生亦願聞之乎予曰唯唯桐學自宋范文正公初建城北隅錢君倚先生遷城東南至明翠渠周先生又規新祖舊廣大悉備桐之人士爰蒸蒸起焉甲申乙酉之交兵燹蹂躪學與

文廟遂淪灌莽部院李公道司袁公各捐廉百金按院上官公捐金二十兩暨孫學正督之而明倫始有堂此今上八年事也時 啟聖宮且半欵左廡廂全缺

先師正殿亦未竣風雨之久決流成渠十年癸巳如馨承

乏學正謁廟周視怒焉心憂卽躬歷四鄉多方勸諭衆皆欣諾而工費浩大未能遽興適華宇孟侯於甲午春

來守茲土急議修葺出俸百二十金爲闔郡倡而東廡

鼎新庠生包崙鄭啟宸濮陽至戈啟鍾王景皞李復致

趙先簡王燦如耆民葛應時盛日隆周元徵戈鈞卿勸

募襄事而堂廡燹聖始具丹雘重輝十一年冬告成惟

泮池未濬以公車期迫嗣續志焉及抵京聞道司孫公

捐金鳩砌刻日告竣而奕奕黌宮遂與桐山並永矣予

曰是舉也爲聖門功臣爲 且孟侯賢守也學之前池有

盛朝敷化豈淺鮮哉因記之

數畝茵苔千百本侯以公暇把荷香煮流泉率子弟之

俊秀者圍橋誦臨水詠歌涵泳乎六禮七樂入政之

要旨以申明乎簡賢誦不肖之大權永繼乎文正君倚

翠渠諸君子之風烈是則予之望也夫 陳祥裔重建

橋星門石坊泮橋碑記辛巳四月七日將晡密雲驟

蒸障景大晦雷奔電掣暴風疾隨 文廟燹頰搏扶搖

而上旋轉如車輪自相擊撞須臾蜿蜿蛇蛇恍惚有物

起泮池挾甚雨去橋坍塌入池淖盈尺石坊三仆地散裂

而橋星門與明倫堂大門一時傾圮人謂泮沼騰蛟爲

君子豹變之象余往驗之水澄瑩寒冽侵人洵若有異

但損廢處不早修建行將塞榴翳邱糞壤漸滋爲害因

憶余初莅謁廟胥役惟供除道避太守觀瞻其他蕪穢

皆置不治異族蟄藏有自來也迨及仲丁恭行祀典禮

器汚慢名存實亡大樂乖離不準法度且以僧道充入

舞列其曷以將謹嚴告豐備也亟詢以故則曰兵燹灰

殘至今未復余惕然震懼恪遵時憲倣 文廟禮樂志

置備供案獻案洗案供尊案尊壘案拈篚香几香鼎花

瓶茅沙池燔爐各奇其數又偶而置執爐提爐燭臺燭

樂庭燎燎義瘞鉞麾旛旌節之具以昭儼恪又置太尊
 山尊犧尊象尊壺尊尊雲雷尊及罍洗彝罍登銅簠簋籩
 豆俎勺諸器各足所用而禮制畧備禮運有之五聲六
 律十二管還相為宮也欲諧五聲必合八音余於革則
 置磬鼓建鼓楹鼓足鼓鞀鼓田鼓相鼓搏拊於金則大
 鏞之外有罇鐘十六歌鐘十二以奮石之特磬十六歌
 磬十二絲有琴瑟竹有簫管篪笛所謂笙者以匏為之
 未得其良姑以竹代若墳者土也祝敵者木也皆古之
 樂也又詳設樂舞生若干名優其禮衣以侑衣授以籥
 翟教以進退屈伸俾知聲容度數自是而後春秋二祀
 乃得器皿完潔登降中式夫以薦裸缺畧積習久沿余
 急之也會不崇朝今毀壞廟貌何敢怠忽以廢後觀於
 是捐俸為倡大集紳士博諮建復共勦厥成隨召各匠
 估工料所值計石居十之五木三之五瓦場一之其一則
 銅鐵油麻雜用之物而匠工餼廩以是為差量度出入
 資聚慮不足用余益以磚瓦木植涓吉鳩工奔趨恐後
 而廣文汪君才識敏練董成其事五閱月日工告訖功
 櫛星之飛裏畫棟靈龍高聳望標里許石坊巖巖峻嶒

余列泮橋持持坦可歷廣可臨且於殿廡上下板檻之
 撓腐者填之完之及級墻垣之零落者蓋之聖之吾知
 濟濟多士習禮於其間登明倫之堂春絃夏誦以磨勵
 其光芒門之內輪焉與焉門之外學塘汪洋縈繞殿宇
 必且同志追隨溯洄忘倦因做濂溪愛蓮之旨廣放芟
 荷俾樂羣於花葉之陸離亦觀感乎中通而外直廣文
 曰是役也殫厥心力不可無以記之余曰余何所記哉
 皇上誕敷文教尊師重道之典訖於四海藐爾修崇未足
 鼓吹邇隆於萬一余則何敢記哉然司牧之任教養為
 重教之不先養亦奚賴學校廢缺教自奚施余周旋
 文廟先之以品制而禮樂聿新繼之以經營而觀瞻有
 肅不特造士以斂才尤可厚俗敦倫挽囂漓於淳樸以
 行吾保息養民之志其於
 盛治休明不無小補余之寤寐以思而厚期於桐泖者職
 是故爾余何能不記哉乃為詩曰維天垂象權輿太荒
 故之不革新曷以彰翳此鬻序蛟飛怒張亦毀榱桷亦
 裂石坊揆日肇始規鞏程唐廟貌嚴肅而復輝煌
 先聖羣賢憑依降祥師儒抱德講讀有常矧茲釋奠禮樂

皆臧肆夏采齊鐘鼓鏗鏘益以損成靡勿苞桑流衍弗
 墮邦家之光乃誌金石俾不或忘奉直大夫知廣德州
 事大興陳祥裔撰候補知縣南州徐濬書州判大梁侯
 振世學正六安徐銓成訓導邦江汪茂齡吏目宛平金
 映（帥家相重修廣德州學記）學育材地也天下之材
 莫不出於學匪學則無以成天下之材然材之需於學
 者在於敦本而明理本敦則德立理明則藝成德與藝
 二者學之實也學莫患乎名之相狗而亡其實上以實
 求下以名應則人有負於學而求其材之成也不亦難
 哉廣德有學舊矣其間與替相尋後先相望備載志乘
 歷歷可稽宋范文正公為司理時初肇學於城北隅錢
 公輔遷城東南中更兵燹民居半燬而學宮亦因以圯
 頽淪蕪榛莽焉嗣中丞李公等重修之歲庚午余荷
 簡命出牧茲土下車之日肅謁文廟載瞻廊廡雖翬
 飛鳥革殿貌維新而榱桷黯然墉垣剝落者不一其處
 備訊顛末則前牧會君尚增署牧呂君轍倡募鳩工因
 捐數止收其半工價未敷以致觀成無日余承乏二君
 後又何敢諉謹捐歲俸之半復諭董事照簿勸收濟用

閱四年而功竣書云若作室家既勤垣墉維其塗墍茨
 此之謂與於時闔學諸生請伐石紀事余曰余之殷殷
 於學校而繼修前績者非曰觀美藉以章教爾諸生
 當明盛膏沐化澤誠能敦其實不浮慕其名致知篤行
 敬業樂羣將洒掃應對而敬其事則窮理達天之學斯
 寓弦誦羽籥而致其精則知化存神之妙以臻近不踰
 屋室戶庭而蘊天地萬物之奧習不外耳目口鼻而通
 陰陽鬼神之微余嘗編列條規為諸士訓所謂孝弟植
 立品之基通經樹文藝之根本末先後循之有途而致
 之有漸職此故夫爾諸生其相砥勉德業並進而行
 修經明則名副乎實以成其材而備其用庶上副
 聖天子建學育才訓誡鼓勵之至意而下亦不負余區區
 整飭黌序誘掖激勸之殷懷云爾是役經始乾隆十四
 年三月落成乾隆十八年九月督理其事學正華君恒
 泰訓導史君化鳳功實多焉其贊襄則貢生濮陽緒生
 員趙捷洪輝光劉爛等例得並書至樂助之士民另碑
 鑄載毋使姓氏久而湮沒云
 賜進士出身奉直大夫知江南直隸廣德州事前吏部文

選司主事武英殿入直翰林院庶吉士奉新帥家相謨文乾隆二十年十二月穀旦碑現存

正殿南向神位

至聖先師孔子

殿東西四配神位

復聖顏子

述聖子思子俱西向

宗聖曾子

亞聖孟子俱東向

殿次東西十二哲神位

先賢閔子損

先賢冉子雍

先賢端木子賜

先賢仲子由

先賢卜子商

先賢有子若以上俱西向

先賢冉子耕

先賢宰子我

先賢冉子求

先賢言子偃

先賢顓孫子師

先賢朱子熹以上俱東向

東廡從祀神位六十有二

先賢蘧子瑗

先賢澹臺子滅明

先賢原子憲

先賢南宮子适

先賢商子瞿

先賢漆雕子開

先賢司馬子耕

先賢梁子鱣

先賢冉子孺

先賢伯子虔

先賢冉子季

先賢漆雕子徒父

先賢漆雕子哆

先賢公西子赤

先賢任子不齊

先賢公良子儒

先賢公肩子定

先賢鄒子單

先賢罕父子黑

先賢榮子旗

先賢左人子郢

先賢鄭子國

先賢原子亢

先賢廉子潔

先賢叔仲子會

先賢公西子輿如

先賢邾子吳

先賢陳子亢

先賢琴子張

先賢步叔子乘

先賢秦子非

先賢顏子噲

先賢顏子何

先賢縣子亶

先賢樂正子克

先賢萬子章

先賢周子敦頤

先賢程子顥

先賢邵子雍

先儒伏氏勝

先儒公羊氏高

先儒董氏仲舒

先儒董氏仲舒

先儒后氏蒼

先儒杜氏子春

先儒諸葛氏亮

先儒王氏通

先儒范氏仲淹

先儒歐陽氏修

先儒楊氏時

先儒羅氏從彥

先儒李氏侗

先儒呂氏祖謙

先儒蔡氏沈

先儒陳氏淳

先儒魏氏了翁

先儒王氏栢

先儒趙氏復

先儒許氏謙

先儒吳氏澄

先儒胡氏居仁

先儒王氏守仁

先儒羅氏欽順

西廡從祀神位六十有一

先賢林子放

先賢宓子不齊

先賢公冶子長

先賢公哲子哀

先賢高子柴

先賢樊子須

先賢商子澤

先賢巫馬子施

先賢顏子辛

先賢曹子邴

先賢公孫子龍

先賢秦子商

先賢顏子高

先賢壤子駟赤

先賢石子作蜀

先賢公夏子首

先賢后子處

先賢奚容子歲

先賢顏子祖

先賢句子井疆

先賢秦子祖

先賢孫子成

先賢公祖子句茲

先賢燕子伋

先賢樂子欬

先賢狄子黑

先賢孔子忠

先賢公西子歲

先賢顏子之僕

先賢施子之常

先賢申子棖

先賢左邱子明

先賢秦子冉

先賢牧子皮

先賢公都子

先賢公孫子丑

先賢張子載

先賢程子頤

先儒穀梁氏赤

先儒高堂生

先儒孔氏安國

先儒毛氏萇

先儒鄭氏康成

先儒范氏甯

先儒韓氏愈

先儒胡氏瑗

先儒司馬氏光

先儒尹氏焯

先儒胡氏安國

先儒張氏栻

先儒陸氏九淵

先儒黃氏幹

先儒真氏德秀

先儒何氏基

先儒陳氏澔

先儒金氏履祥

先儒許氏衡

先儒薛氏瑄

先儒陳氏獻章

先儒蔡氏清

先儒陸氏隴其

案先賢先儒神位李志尚沿舊時次序今謹遵乾隆十八年內閣會典館奏准位次登載又楊門李志詳載聖賢歷代封號與諸儒祔祀年分此皆炳見各史

志及闕里志與

大清會典故不復載

禮器萬厯志明宏治中知州辛禮造萬厯十三年知州

陸長庚再飭之萬厯二十三年知州段猷顯又增飭而

新之而文廟之有銅器自禮始楊志禮器七百三十

有一今俱燬於兵案康熙四十年知州陳祥裔即其殘

缺者增補之詳前碑文亦尚未備後復缺損乾隆五十五年

知州胡文銓擇其尤要者捐俸修補之

祝板一無

大銅香爐一無

小銅香爐八 無

鐵香爐八 存二

木香爐十 無

磁香爐十 新補

錫香爐一 存

大銅花瓶二 存

小銅花瓶十二 無

木花瓶六 無

小錫花瓶二 無

大銅燭臺二 存錫燭臺二

小銅燭臺二 無

小木燭臺四十 新補

銅爵一百三十三 存三

錫爵一百四十二 存七十六

銅罇四 無

錫罇一 存

銅犧罇象罇各一

存象罇一已損壞新補木犧罇二

銅兔罇豕罇各一 無

竹籩一百四十二 無

銅籩十 無

銅豆十 無

木豆一百四十二 新補

銅酒海三 無

銅釧三 新補錫釧一

銅簠簋各十 舊補錫各十

銅杓九 無

錫盥盆一 無

木帛箱九 存

木長盤四 無

木方盤二十九 無

紅紗燈八 無

木滿堂紅八 無

木牲盤八 無

鐵鍋七 無

案二十七 存十一

牲臺二存

樂器元延祐中總管史烜造

牟應龍撰
記見藝文

楊志樂器六十

八今俱燬於兵案康熙四十年知州陳祥裔增補乾隆四十四年學正朱裕觀同佾生修補五十五年知州胡

文銓修

麾一舊補二
新補二

祝一新修

鼓一新修

琴六存二
新修

瑟二新修

埙二存一
新修

篪二存一
新修

笙六存二
新修

排簫二存一
新修

大鼓一存

拊鼓二存一
新修

銅鐘十六存另銅
罇鐘二

銅磬十六存

簫四新補

笛四新補

案右所列禮樂器均係萬厯志原數楊門志照此開

載而曰今俱燬於兵似無一存者李志亦照楊門開載而刪去俱燬句似無一闕者今查現存銅瓶銅爵

象罇均有宏治四年二月提調官辛禮造字樣可見稱俱燬之謬但雖經陳祥裔增補讀其碑記所載較

之萬厯原數尙多未備李志列原數而不言闕亦非
茲故詳注原物存否與近今修補於其下俾可核實
云

舞器楊志今俱無

旌二補舊

翟三十六無

籥三十六無

帶三十六無

舞冠三十六無

服三十六無

崇聖祠舊名啟聖公祠南畿志明嘉靖十年制增啟聖祠

楊志在文廟東北案康熙十四年學正馮益禧重修

據馮手書畱記五十八年知州周在建學正吳寧謐重修

據尊經閣

匾上吳自記雍正元年奉

旨改稱啟聖祠為崇聖祠重題門額乾隆四十五年知州

石應璋學正朱裕觀重修

祠中南向神位

肇聖王木金父公正中

裕聖王祈父公東一室

詒聖王防叔公西一室

昌聖王伯夏公東二室

肇聖王叔梁公 西二室

祠中東西四配神位

先賢顏氏無繇

先賢孔氏鯉 俱向西向

先賢曾氏點

先賢孟氏激 俱向東

兩廡從祠神位

先儒周氏輔成

先儒程氏珦

先儒蔡氏元定 以上俱即在祠中次東西向

先儒張氏迪

先儒朱氏松 俱祠中次西東向

忠義祠 江南通志 在州學內 李志 明倫堂東 雍正五年奉

文建案 在明倫堂東南堂門各三楹 乾隆五十八年門

圯知州胡文銓同學正王其福訓導吳景濂修并製牌

神位

周烈 籍未詳 宋建炎三年知廣德軍事 殉金兵之難 詳宦績

王儔 本州人 宋建炎末 真州通判 權通判 廣德軍 殉戚方之難 詳忠烈

李唐俊 本州人 宋建炎末 權通判 廣德軍 殉戚方之難 詳忠烈

朱嗣孟 樂平人 宋建炎末 任廣德司戶 參軍 殉戚方之難 詳宦績

潘偶 本州人 宋建炎末 權廣德軍司法 殉戚方之難 詳忠烈

韋績 籍未詳 宋建炎末 權知廣德縣 殉戚方之難 詳宦績

蔣夔 籍未詳宋建炎末權廣德縣丞殉戚方之難詳宦績

吳琦 本州人宋德祐乙亥年任太學講書殉元兵之難詳忠烈

王汝翼 建平人宋德祐年知廣德縣殉元兵之難詳忠烈

趙時踐暨子 采石人宋德祐年任廣德司戶參軍攝建平縣事殉元兵之難其子亦死詳宦績

趙時晦 籍與官未詳宋德祐年寓居建平與元兵戰不屈死詳寓賢祠牌舊書暨二公子誤詳九烈祠

孟唐老暨二子 籍未詳宋德祐年官斗山路分與王汝翼同殉元兵之難詳宦績

張濡 籍未詳德祐末知廣德軍殉元兵之難詳宦績

關住 籍未詳元至正年任廣德翼萬戶死寇難詳宦績

齊泰 溧水人明建文時兵部尚書至廣德與王叔英合謀起義後被執殉節詳宦績

王叔英 黃巖人明建文時官翰林修撰募兵廣德殉難詳宦績

林英 古田人明建文時官御史募兵廣德與王叔英同殉難詳宦績

姚恕 建平人明建文時御史殉難詳忠烈

姚善富 建平人明建文時太學生殉難詳忠烈

宋鼇 湘陽人明嘉靖中任建平縣丞殉倭寇之難詳宦績

蔡啟元 本州人明嘉靖中擊賊于奉化戰死詳忠烈

蔡允元 本州人明嘉靖中官指揮為南韶賊所執不屈死詳忠烈

潘廷楫 建平人明崇禎時官安東衛經歷寇難殉節詳忠烈

夏魁暘 建平人明崇禎中官武義教諭攝浦江令寇難殉節詳忠烈

趙景和 錢塘人明末知廣德州守城死馬士英之亂詳宦績

任佐君 籍未詳明末任廣德同知死馬士英之亂詳宦績

杜鶴年 安化人明崇禎末建平令殉節詳宦績

附張義民 唐末廣明年率義兵禦黃巢戰死詳忠烈

案忠義舊無專祠雍正五年始奉

特敕建于郡邑學中以褒嘉忠節使數千百年沉鬱之孤

忠並得俎豆膠庠光昭史冊洵盛典也且奉行

朝命與舊時九烈詳後民間私祀者迥異有主持風教之責

者自宜加意搜訪以仰答

聖天子闡揚幽隱盛心乃李志學校門不登此祠祠祀門

但紀建祠之年而不載所祀之人疎矣及觀祠牌所

奉又僅十有五人 王儔李唐俊朱嗣孟潘偶韋績蔣夔王汝翼趙時晦時踐王叔英姚

恕宋鼂蔡啟元允元夏魁賜夫以建炎諸人而論則周烈宜首祀

以德祐諸人而論則吳琦孟唐老及二子趙時踐之

子與張濡皆先後殉節者也元有關住明建文尚有

齊泰林英姚善富嘉靖尚有潘廷楫崇禎尚有趙景

和任佐君杜鶴年是數人者事蹟炳載正史或軼見

記傳當時均未詳考致有漏遺伏讀

欽定勝朝殉節諸臣錄齊王林及趙夏五公並蒙

賜諡入祠

恩綍榮施

瑤編頒布溥海臣民靡不聞風欣仰寧有寓遊蒙難之地

城守籍隸之邦尙敢沿襲舊規不亟謀所以敬承

德意徧賁幽潛乎謹易堅木彙勒姓名冠以

寵諡庶英魂毅魄蒼萃一堂肸鬻春秋籍展祇敬焉至唐

世義民張氏禦賊捐軀居民嘗爲立廟曰誓節今廟

雖圯廢故蹟猶存伏念

聖朝褒錫孤忠不遺微末如虎邱儒士若耶樵夫均得同

邀祀典張氏奮身捍患死而廟食詎可令其久而湮

沒今亦祔祀以慰忠魂於風教當有裨益也又案會

典開載雍正三年禮部議覆令直省州縣分別男女

各建二祠一爲忠義孝弟祠建學宮一爲節孝祠另

擇地營建然則廣德所有歷代奉旌之孝子當時亦

應建祠奉祀茲謹考列應祀孝弟諸人以俟後舉

潘晃

本州人唐天寶年詔旌授廣德令詳孝友

李彭年

本州人宋紹興進士高宗詔旌詳孝友

王安兒 建平人時代未詳有割股廟載通志詳孝友

李貴 建平人時代末詳有孝義橋載通志詳孝友

范日進 建平人宋咸淳時家衆三百人同爨載通志詳孝友

姚觀壽 本州人明洪武間旌表詳孝友

宗維漢 建平人國朝雍正十一年奉旌詳孝友

雲像會 本州人國朝乾隆元年奉旌詳孝友

名宦祠 萬厯志戟門外左舊為神厨為宰牲所今為名宦

祠先是明正德中知州劉節建於 文廟後嘉靖七年

案東廓州志自序稱五年丙戌修志逾年徙官去則七年乃其去任之年也 判官鄒守益建

於復初書院門左 案即尊經閣門左也 嘉靖三十三年知州莊士

元改建於此萬厯二十四年知州段猷顯又撤而新之

繚以垣墉視昔加偉 案康熙十四年學正馮益禧重修

據馮手書 歲久木料朽壞乾隆五十六年圯神位暫移

四先生祠中現擬重建

神位

張純 三國吳嘉禾間廣德令舊作漢誤 梅詢 宋真宗時知軍事

錢公輔 宋英宗治平中知軍事 孫覺 宋神宗熙寧中知軍事

洪興祖 宋高宗紹興中知軍事 黃震 宋度宗咸淳中通判廣德軍

趙時踐

宋末司戶叅軍

王新

明洪武中同知

羅坤泰

明永樂中知州

袁沂

明成化中學正

孫紘

明宏治中知州

李汝桂

明萬曆中訓導以上俱見萬曆志

胡子晉

明萬曆中同知

張嗣誠

明萬曆中知州

程良符

明崇禎時知州以上見楊志

趙景和

明末知州殉難祠有牌舊志失載

案以上十六人皆官於廣德者事實均詳宦績然應

祀者實亦不止此也其祠牌尚有周孔教常名揚馬

鳴佩張泰交范承勳鮑復昌陳鵬年余正健邵嗣堯

諸人均係督撫提學等官江南府州縣名宦祠中皆

入牌者今亦一體崇祀焉

鄉賢祠萬曆志戟門外右舊為神庫為致齋所今為鄉賢

祠其先建置與名宦祠同楊志康熙四年圯知州楊苞

學正荆振日重建案乾隆五十年學正沈曙訓導潘煥

溥同後裔重修

神位

查深

宋治平間人詳儒碩

倪濤

宋大觀進士詳名臣

何大圭

宋重和進士詳文苑

沈虛中

宋宣和進士詳文苑

梅應發

宋寶祐進士詳名臣

張政

明永樂進士詳名臣

濮陽瑾 明天順選貢詳循吏

王世祿 明正德進士詳循吏

李天植 明隆慶進士詳名臣

姜洪 明成化進士詳名臣

李崇謙 明嘉靖舉人詳循吏

范文正公祠宋紹興中知軍洪興祖求公遺像繪而置之

學宮使學者世祀之汪藻撰記 見藝文 萬厯志舊在儒學

井亭左嘉靖三年 案鄒東廓周公祠記稱嘉靖甲申議建文正祠於書院後甲申嘉靖三年

也舊志作七年 判官鄒守益改建尊經閣後復初書院內

年誤今改正 案書院即閣故云說見後 尋圯萬厯間合祀今四先生祠內 另詳後又康熙

間知州朱國柱別建祠於硯池塘側詳壇廟

古四先生祠明一統志在州學元時判官秦德用建以祀

宋司理范仲淹郡守錢公輔孫覺洪興祖以其有興學

功也郡人梅應發撰記 案記稱紹定二年作范錢洪三

十一年秦侯撤而新之增入孫覺名四先生祠堂詳藝文 案是祠久廢范在明世則

先有專祠後再合祠 詳後 錢孫洪皆歸名宦祠祀之

案四先生祠建於元世雖在前明已委榛莽而凡類

書中載桐川祠廟必及之自萬厯中更創四先生祠

主猶四而人易三萬厯志遂載新而沒舊數典忘祖可乎故今列各祠先自宋元始

懷忠祠南畿志在文正祠左萬厯志嘉靖三年判官鄒守

益既改建范公祠於尊經閣後并建王靜學英叔祠於其

東名曰懷忠案王叔英死節之銀杏樹即在其後故東

英祠吳同春遂建特祠於墓所名尋圮萬厯間亦合祀

於今四先生祠以其址建存忠亭另詳

周公祠南畿志在儒學內萬厯志舊在道義門左正德中

知州劉節建以祀前知州周瑛案嘉靖三年判官鄒守

益以祠湫隘既移祀范文正於尊經閣後新祠中而以

周公位移於范公舊祠中案即前所云井亭左之范祠

門右鄒自撰記見藝文萬厯元年知州鍾振就集

英館址改建在范文正公祠西案井亭左祠自此遂廢

閣後矣十四年知州陸長庚修葺尋圮二十五年亦合祀

今四先生祠中詳

四先生祠萬厯志在尊經閣鄒先生祠後鄒守益所建范

公祠懷忠祠鍾振所建周公祠皆圮萬厯二十五年知

州段猷顯即鄒公祠址改建一祠案鄒祠本在北范祠

為鄒祠而以鄒祠址為四先生祠
故前云在鄒先生祠後互詳下
入真西山同堂異龕

合而祀之且撰仰止編以示景行之意楊志今圯

國朝康熙六年學正荆振日改舊學署樓房三間為四先

生祠在 文廟西案學正署舊在西廡後荆振日移建於文廟東故以舊署樓改為祠云

李志後又圯雍正十年知州詹宜倫重建於尊經閣左

案今在閣門外左即
雍正間所建者也

神位

范仲淹 宋參知政事
前司理參軍

真德秀 宋資政殿學士前
江東轉運副使

王叔英 明翰林
院修撰

周 瑛 明四川布政
使前知州事

鄒東廓祠萬曆志舊在尊經閣蓮花池後萬曆四年知州

吳同春建以祀南京國子祭酒前判官鄒文莊公守益

案李得陽撰
記見藝文 尋圯萬曆二十五年知州段猷顯從輿議

即范文正祠舊址建祠專祀之詳楊志李徵儀建二楹

於祠後案此二楹何以添設
楊志不言其故殊疏案祠久圯乾隆四十五年

學正朱裕觀復建於道義門左而以明知州夏案祠牌

舊志祠祀門亦無祀夏公者稽之明知州嘉靖中有夏

臣任僅一載崇禎時有夏時任三載政績俱無考朱裕

國朝知州閔以棟案閔有專祠在州治東關帝廟中朱裕
其牌位向在州治東關帝廟中朱裕觀移祀於此
觀又增設牌位於此閔專祠另詳壇廟

毛渾案西廡後舊有祠祀渾乾隆丙戌祠圯移主於學正署門屋中朱以其褻故移入三主祀焉

案學中祀東廊載在州署禮科舊冊有祀祀當時從學者八人姓名詳寓賢又李志載康熙間李邇泰建書院迎東廊及從學九人木主祀之知鄒祠中自有祀祀者今祀祀之人皆係鄒後郡守則以祠圯而牌位無存前志又未詳載隔數十年始復有建祠祀之者宜其未暇深考矣

土神祠楊志

文廟西北案卽懷忠祠址也不知何年改

爲土神祠乾隆四十五年祠圯學正朱裕觀訓導吳維瓊移建於道義門東

文昌祠楊志載有祠田而未詳其址考明史宏治間行令天下學校拆毀文昌祠或卽廢於其時與

九烈祠楊志今圯

案萬厯志但載所祀九人不詳所建之地楊志但云圯亦不言其址迨雍正五年建忠義祠於學首以九人崇祀其中從此忠魂毅魄俎豆千秋矣惟是烈不止九猶之賢不應六乃近學正朱裕觀以九烈之號

傳自元明不立遽泯因與明之六賢復合建一祠焉

見後

六賢祠萬歷志萬歷三十年知州何鳳起建楊志今圯

案萬歷志不詳所建之地并六賢亦未載續萬歷志

列其姓名首鄒東廓是矣而連及曾來講學之錢沈

二王與嘗撰東廓祠碑之耿定向碑見藝文統名為六賢

考耿定向從未來祠不應祀於此即東廓曾膺民社

功德在人既有專祀未便與偶來講學者同列六賢

之稱似未盡協

九烈六賢祠在三台閣舊址北乾隆四十五年學正朱裕

觀建為堂三楹額曰正氣萃茲

神位

王儁 李唐俊

潘偶 韋績

蔣夔 朱嗣孟

王汝翼 趙時踐

趙時晦案萬歷志時晦下書及二子考宋史不載時晦子而載同死之孟唐老二子舊志誤詳忠烈

吳寧謐九烈祠樂府守耶丞耶倅耶尉耶僚屬耶兄弟耶一人義憤肝膽裂羣賢併命手同擊寅恭素協肘誰

擊垣麓久和聲不輟吁嗟乎一城一池須問主者誰撐
半壁誰支大厦二三小臣尸裹血灑柰何中朝非秦則
賈

右宋九烈籍貫事實詳前忠義祠

鄒守益 安福人 詳宦績 錢德洪 餘姚人 詳寓賢

王畿 山陰人 詳寓賢 王艮 泰州人 詳寓賢

沈寵 宣城人 詳寓賢 耿定向 黃安人 嘉靖末南 京學政明史有傳

右明六賢

案李志載九烈六賢二祠俱圯移木主於文昌閣所

謂文昌閣者即三台閣也後閣亦圯故朱裕觀復合

建一祠以祀之然烈與賢原以祠同圯而偶合之究

非義所應合者也竊謂九烈崇祀忠義東廓專祠學

中此祠只祀寓賢四五人也可

青雲樓萬厯志在儒學東明嘉靖十三年判官涂相買民

地建 案涂自為 督學聞人銓顏曰雄峙宮墻 案今前後

各三楹萬厯十二年知州陸長庚修 案陸自撰 樓後屋

五楹中為碑亭 案今屋與 判官聞思政建後有池陸又

周圍葺牆門外建石坊匾曰頭角崢嶸勒本州科甲於

上 案今坊 匾俱無 門左舊有建樓碑亭今圯迤左為聞判遺思

碑亭

案今亭亦無

又左為榛邱二

楊志榛邱誤作禁邱又刪二字誤

舊傳為

錢狀元用壬塚萬歷二十年段猷顯為豎碣以識更改

青雲樓額為五雲樓左有梯雲樓楊志梯雲樓今圯

國朝康熙元年知州陸翔華學正荆振日各捐俸倡諸生

助貲重建

案陸荆均有記附後

仍顏其額曰青雲樓上供

文昌

帝君右有陸公建青雲樓碑亭

案今碑存亭圯

案康熙四十七

年樓圯郡人雲中官倡募重建未竟而卒雍正六年其

子輝萼復募成之學正胡伯炯撰記

見藝文

乾隆四十七

年前樓將圯學正朱裕觀募修方興工而朱卒事遂中

止今前樓僅立柱礎待修孔亟云

明陸長庚青雲樓記州治東南數百步為學宮稍轉

而東有樓名青雲又稍轉而南依州堞為閣名文昌先

是郡倅涂君勅置羣博士弟子讀書其中久且敝不佞

來守茲土思稍加繕輯迺諭諸明口聞君雅相合也因

使封人慮事量功聚材平板榦稱畚築畧楹廡程用物

決數十旬竣事偕不佞登焉謂不可無記余惟斯樓之

有造於多士也躍然起曰噫樓美矣而以青雲名何為

哉以余所聞太史公巖穴幽棲者流非附青雲之士不

能自顯故曰升之則在青雲之上抑之則在深淵之下

由斯以譚士亦惡能與世浮沉而無貴乎青雲為也明

興以右文風海內士彬彬趨於行誼垂二百餘年今上

神聖復申飭學官期於雅馴以稱得士意甚懇厚夫士

也生於蓬華遭逢明聖釋褐而趨紆青拖紫內則卿相

外則監司二千石刺史縣令得有所表見以垂不朽非

所稱青雲之士能自顯榮者哉今天下南北士治經術

修行誼以須朝廷任使即無慮千億已而獨首吾浙桐

泗去浙莽蒼間耳而風氣稍不類搢紳先生能自致於
 青雲者雖嘗接踵而未能人人稱得意其有沉伏艸茅
 豈所樹立豈非守土者責耶不佞與聞君司教翼菴黃
 君俱以吾浙來後先振起亦惟是二三同志若釋所王
 君司訓李君輩左右之所為蚤夜斤斤期於得士矣而
 顧安所令多士向方迺不佞有聞管子治齊使夫士羣
 萃而州處習而安焉終身不見異物其教不肅自成且
 夫管子固卑卑倡霸者耳而猶然知此假令不佞一日
 忘此心其若朝廷與士庶何即無斯樓猶將數數然為
 多士經始也者而矧其因之已乎余以為樓之因廢士
 之善敗關乎世風本乎家國事匪偶爾士而有曠觀選
 視塵芥六合登斯樓能為朗鑑士而有仗節舒氣瑰璋
 沉鬱登斯樓能為豪舉士而有卑瑣局踏窮阨周章登
 斯樓能為如是則可以長有令名聲施後世夫令名德
 為達資如是則可以長有令名聲施後世夫令名德之
 興也德家國之基也有基無壞樓之謂矣士無亦是務
 乎且士亦見夫北溟之鯤乎化而為鵬搏扶搖羊角而
 上者九萬里斥鷃笑之曰彼且奚適矣我騰躍而上不

過數仞此小大之辨也多士願為鵬不為斥鷃則九萬
 里舍青雲奚以適哉僉曰諾其命工鑄之樓唯初制旁
 有舍於後更貿居民田為屋數楹垣數十尋稍廣其舊
 門以外則移豎石坊其上題曰頭角崢嶸取雲龍之義
 也董是役者則義民濮僅濮備老人張大仕效有勤勞
 云萬歷十三年歲次乙酉十月賜進士出身奉訓大夫
 知直隸廣德州事鵝湖陸長庚撰文郡人李得陽書丹
 夏良心篆額同知王省括判官聞思政署學正黃應奎

訓導李一孝

國朝陸翔華重建青雲樓碑記古刺史之治郡也類有亭

閣臺榭以表山川都邑之盛若廬陵之在滁則建亭曰

豐樂曰醉翁眉山之在扶風膠西則建亭曰喜雨建臺

曰超然余讀其文詞雖得宣上恩澤與民共樂之意然

天子命來守是邦凡所營建當以有裨士民者為之學校
廢舉墜真長吏責也余以辛丑五月莅桐下車之日即
詢民生利病士風淑慝廣文覺菴荆君告予桐自置郡

後銅龍金馬代不乏人邇多士濟濟歌鹿鳴與賓興者未數見則以學宮龍勢自筭山而來嚮予從祖津陽公於萬曆癸未承乏此州特建樓以挹之自兵燹之餘鞠為茂艸科目亦遂寥落予即引為已任輸貲鳩工而荆君同僚友彞度盧君諸生盧琦名趙先簡濮陽至雲旭等朝夕勤劬不遺餘力逾年樓始成予與僚屬諸生登高而觀之橫峯茅嶺義蒼五老諸勝若近若遠高下隱見環遶其側蒼松古木掩映於烟雲杳靄間其殆有飛仙羽客高人逸士在乎俯瞰城郭參差烟火不下萬家桑麻雞犬雜出竹籬茆屋外凡民物之耗阜歲時之豐歉無不一覽而得之則文章政治此樓均有助焉異日諸生走馬長安獻書獻賦直須一日之所得者應之裕如矣斯樓豈僅供游觀資觴咏與豐樂醉翁喜雨超然相頡頏哉爰勒數言以識於石

荆振日重建青雲樓記事碑余以庚子春來視桐學念既一日長諸生不僅道義文章相與朝夕摩切已也思之也深以摯而期之也宏以遠凡可以扶進人材者必盡誠殫力求其大成而後慰焉初接諸生麟麟郁郁殊多雋上之姿迺兵燹

後尚無登賢書者豈盡由人事抑氣化陰陽有未協者與乃徘徊學宮顧與隅散衍風氣疏洩無以翕滙秀靈因攷州乘明嘉靖以前科第寥寥自東潭涂公建青雲樓於學左以補其偏津陽陸公復營治焉而規模益廓百年之間人文蔚起迨樓毀而昔之寥寥者復若也是今日急務宜以此為先矣乃諷吉鳩工鼎新聿始會余迫公車辛丑北旋猶是數十棟楹旁風上雨繚垣未周適魏塘陸公來守是邦振興黌序追從祖津陽公之遺蹟捐冰俸以佐工貲余亦以薄修繼之今得落成焉蓋三易寒暑矣樓之峻敞不減舊觀工力艱鉅倍於昔時歷巖谷風雨徧募四境者余廣文職也多方經畫捐廉倡助者刺史靜涵陸公也若諸生省工飭材則盧子琦名趙子先簡濮陽子至雲子旭丁子儀淳等為獨瘁夫前賢一涖茲土即鯁鯁焉為數百年人材計後乃任其頽廢而不顧則今雖幸觀厥成而尤冀後賢之善為繼也敢不備書始事之艱以告來者多士勉乎哉太史公曰砥行立名非附青雲之士惡能施於後世蓋顏子夷齊得夫子而益彰也則青雲之義徒科第顯奕云爾乎

余仍厥名焉
猶此志也夫

三台閣舊名文昌閣萬曆志在儒學東南萬曆六年知州吳同春買民地建閣三層南瞰女牆上供文昌顏其額為斯文主宰閣外為短垣前峻以石階階右為屋三楹以居管閣者萬曆十三年知州陸長庚重修閣右築青雲路一百二十五丈迤東而北出於通衢兼濬龍門水迤邐以達文明溪溪上建登龍橋蓋閣與青雲樓俱屬吳位先後當事者用形家言設此以補方隅之空翼豐宮衛風氣云楊志今圯門志儒學東南形家言學宮

吳隅風氣疏洩故科第寥寥康熙十一年知州高拱乾倡議捐俸建三台閣以翼衛之

案高自撰記見藝文

前為講堂後

築石臺高二丈許上構巍樓三級頂層奉文昌帝君

像中層供關聖像右有池建亭於其上匾曰清鑑是

歲庠士周烈夏迪忱同雋秋闈此興學作人之效也案

今又圯

國朝韓望建三台閣記九臨高年兄以吾邑鼎彥初仕守

鄣郡政成三期余以權關武林返棹報

命有鄣人士數輩遮余而言曰吾鄣蕞爾殘壤民生日蹙

高侯下車興學校撫流移平徵收雪冤抑省贖緩清編

審杜鑿害飭守望弭萑苻賑饑荒仁惠所敷未易更僕

數大約持心平恕立法寬簡不以鈞距炫明不以揮張

見才惟本乎真誠而行以樂易所以士習而民信之今者侯嘉惠膠庠念州科目晨星以形家言特割俸建閣三級於學宮左名曰三台以應斗魁之象今歲賢書卽雋二人諸弟子員沐教澤者深將叙其懿績勒之貞珉因銓次之以應其請云

案三台閣卽明文昌閣舊址而重建者門志強分爲二叙文昌閣刪節萬厯志與楊志原文幾不知基址在何處叙三台閣直云高拱乾倡建卽高自撰記亦不叙前明舊址殊不思吳同春買民地而閣始有基前人之功惡可沒也今閣又久圯僅存敗石臺而已現擬重建又案九烈六賢祠青雲樓三台閣均在儒

學東南平步橋之東不在學基之內因均係學中廟祠故類載於此

